

La Pancarte Noire de Saint-Martin de Tours, brûlée en 1793, restituée d'après les textes imprimés et manuscrits, Nr. 113

In nomine domini dei et salvatoris nostri Iesu Christi. Hludouuicus divina ordinante providentia imperator augustus. Vobis fidelibus nostris comitibus tam praesentibus quam et futuris necnon iunioribus vestris seu etiam missis nostris per universum imperium nostrum discurrentibus notum sit, quia Fredegisus abbas ex monasterio sancti Martini detulit nobis litteras auctoritatis domni et genitoris nostri Karoli serenissimi imperatoris, in quibus continebatur insertum, quod idem domnus et genitor noster per easdem litteras iussisset, ut ubicunque in ministeriis vestris res sancti Martini esse noscebantur diligenti observatione immunitatem domni et genitoris nostri Karoli, quam ipse eidem venerabili monasterio fecerat, in omnibus observaretur, et deprecatus est nos, ut denuo morem paternum sequentes nostrae auctoritatis litteras habere mereretur, quod ita fecisse omnium vestrorum cognoscat industria. Praecipientes ergo iubemus et per has nostrae auctoritatis litteras praecipimus atque omnino iubemus, ut ubicunque in ministeriis vestris res sancti Martini et Fridegisi venerabilis abbatis esse noscuntur diligenti observatione immunitatem nostram, quam eidem venerabili monasterio fecimus, in omnibus ita conservetis et conservari percenseatis, quomodo a domno et genitore nostro bonae memoriae Karolo et a nobis decretum et constitutum est, et quicunque secus quam in eadem immunitate continetur contra ipsam casam dei agere temptaverit aut in aliquo praecepti auctoritatis nostrae transgressor repertus fuerit, ita iustitiae censura coram vobis adiudicetur et poena multetur, sicut in eadem immunitate nostra continetur. Si vero coram vobis causa prolata minime diffiniri potuerit, sicut in praecepto domni et genitoris nostri continetur, postposita qualibet difficultatis oppositione eosdem homines per fideiussores positos in nostram praesentiam ad placitum condictum venire faciat. Sed et de rebus, unde ipsa casa dei in vestris ministeriis legibus vestita esse dinoscitur, quemadmodum idem domnus et genitor noster constituit, nullius hominis viribus eam expoliari sinatis, sed rem nostro examini iustoque libramini dirimendam relinquant. Ita igitur hanc iussionem nostram adimplere curate, si gratiam nostram vultis habere. Haec vero auctoritas, ut firmior habeatur et a vobis verius credatur et diligentius conservetur, de anulo nostro subter eam sigillari iussimus. [. . .]